

Inatsisissamut siunnersuummut oqaaseqaatit

Oqaaseqaatit nalinginnaasut

Siunnersuutikkut anguniagaasoq pingaarneq tassaavoq siumoortumik nalunaarsuinerup, akileraarusiinerup naammagittaalliuutinillu suliaqartarnerup, tassa imaappoq akileraaruserinerup tamarmiusup pisariillisarneqarnissaa, aaqqissuuteqqinneqarnissaa pitsanngorsarneqarnissaalu, kiisalu aningaasat annertussusileriikkatut pisariaqartitsinerlu naapertorlugu ikiorsiissutitut kommuninit tunniunneqartartut akileraaruserneqartussaannginnerisa atorunnaarsinneqarnissaat. Aammattaaq kinguaariit nikinnerannut atatillugu, sulisut aktiaataasa tuniniaqqitassatut utertillugit pisarineqarnerinut atatillugu kiisalu selskabit aningaasanik niuerfinni nalunaarsortissimasut nammineq aktiaatiminnik utertitsillutik pisinerinut atatillugu iluanaarutisianik akileraarusiisarneq pillugu maleruagassat allangortinneqarnissaat siunnersuutaavoq.

Akileraartartut amerlanerpaartaannik akileraarusiineq inuit ataasiakkaat sulisitsisuinit aningaaserivinnillu kiisalu pisortanit namminernit nakkutilliinermi paasissutissiissutinik tunngaveqartarmat aningaasarsianik angissusiliisarnerit akileraaruseriffinnit ullumikkut ingerlanneqartarput, taamaammat kommissionit akileraarusiisartut pisortatut angissusiliisartutut atuunnerat annerusumik minnerusumilluunniit atorunnaarsimasutut oqaatigineqarsinnaavoq. Taamaattumik siunnersuutigineqarpoq kommissionit akileraarusiisartut atorunnaarsinneqassat, akileraarusiineq kukkunersuinerlu taamaalillutik taamaallaat kommunimi akileraaruseriffimmit, akileraarusiinissaq pillugu Skatterådip ukiumoortumik pilersaarussiaa tunngavigalugu suliarineqartussanngorlugit.

Akileraarusiinermik kukkunersuinermillu sulinerup Skatterådip ukiumoortumik pilersaarussiaa naapertorlugu ingerlanneqarnissaa kommunalbestyrelsemit akisussaaffigineqartussaavoq, akileraarusiinermilli kukkunersuinermillu sulineq nalinginnaasoq kommunalbestyrelsep akisussaaffigissanngilaa, taamaattumillu akileraarusiinermi suliasanik suliaqarsinnaanani. Taamaattumik siunnersuutigineqarpoq kommunalbestyrelsi inummik kommunimi atorfeqartumik toqqaassasoq, kommunimi akileraarusiinermi oqartussaasut akileraarusiineranni kukkunersuinerannilu akisussaasuusamik. Piumasaqaataanngilaq akisussaasuusup kommunimi akileraartarnermut pisortaanissaa. Tassunga patsisaavoq kommunalbestyrelsep kommunit aqunneqarnerannut inatsit malillugu namminerisamik ingerlatsiviliorsinnaanera.

Akileraarusiineramik kukkunersiuerinermillu sulineq pitsaanerulersinniarlugu siunnersuutigineqarpoq kommunit akileraaruserinermik suliaqarnissaminni kommunenik allanik imaluunniit Akileraartagernermut Pisorta qarfirmik suleqateqarsinnaassasut. Taamatut suleqatigiinnerup suliamut tunngasunik ilisimasaqarnermik annertusisitseqataanissaa naatsorsuutigineqarpoq, soorluttaaq kommunit taamatut suleqatigiinnikkut sulinermi pitsanngorsaatinik angusaqarnissaat naatsorsuutigineqartoq.

Naammagittaalliuutinik suliaqariaatsip maanna atuuttup, tassa naammagittaalliuutinik siullermik kommissionimi akileraarusiisartumi aappasaanillu Skatterådimi suliaqartarnerup ileqquliutiinnagaasutut innera, aammalu inatsisitigut illersugaanermut iluaqutaannginnera nassuerutigalugit, ilisimaneqarmammi akileraartartup suliamik imminerminut tunngasunik eqqartuussivinnut suliakkiissuteqaraluarluniluunniit akileraarutissami sinneri akilertussaagai, piffissap naammagittaalliuutinik suliaqarfiusartup naalisinneqarnissaa siunnersuutigineqarpoq, tassa akileraaruseriffiup aalajangiinera Skatterådimit ingerlaannartumik naammagittaalliuutigineqarsinnaanngorlugu, taassumalu aalajangiinera Kalaallit Nunaata Eqqartuussivianut ingerlaannartumik suliakkiissutigineqarsinnaanngorlugu, soorluttaaq siunnersuutigineqartoq Skatterådimit naammagittaalliuut ukiup ataatsip ingerlanerani Skatterådimit suliarineqarsimanngippat Kalaallit Nunaata Eqqartuussivianut suliakkiissutigineqarsinnaassasoq.

Piffissaq akileraarusiiffik allanngortinneqanngilaq, siunnersuutaavorli nakkutilliinermi paasissutissanik nutaanik saqqummertoqartillugu kommunini akileraaruseriffiit angissusiliineq piffissami aningaasarsianik angissusiliiffiusup qaangiutereerneranit ukioq ataaseq tikillugu suliareqqissinnaassagaat. Maleruagassamik taamaattumik peqarnikkut akileraaruseriffiup, angissusiliinerup allanngortinneqartariaqarnera ersaritsillugu angissusiliineramik allanngortitsiniarluni Skatterådimit piginnaatitsissummik qinnuteqarnissaa pisariaarutissaaq. Aammattaaq siunnersuutigineqarpoq Skatterådip, angissusiliinerup kukkusuunera ersaritsillugu akileraaruseriffiit angissusiliineramik allanngortitsinissamut piginnaatissinnaassagai. Taamaaliornikkut naatsorsuutigineqarpoq Skatterådimit naammagittaalliuutit annertuumik amerlinaviannigitsut, tassami kommunini akileraaruseriffinnut naammagittaalliornissamut piffissaliussaq naalineqassammat.

Akileraartartut Skatterådip aalajangiinerinik eqqartuussivinnut suliakkiissuteqartarnerisa annertuumik amerlinissaat aamma naatsorsuutigineqanngilaq, uppersaatsissammi nutaat tunngavigalugit suliakkiissutit Skatterådip angissusiliinerinik suliarinneqqinneratigut naammassineqarsinnaassammata.

Aammattaarlu siunnersuutaavoq akileraartussaataasup naatsorsuutai il.il. pillugit paasissutissat qarasaasiatigut nalunaarsorneqarsimatillugit akileraartarnermut oqartussaasut naatsorsuutit il.il. pillugit paasissutissanik takunnissinnaatitaanerat aamma qarasaasiatigut takunnissinnaatitaanerannik ilaqassasoq, tassami kukkunersiulluni sulinermi qarasaasiat atornissaat pappialarpassuarnik misissuinermit pitsaanerussammat.

Kiisalu akileraaruseriffiit, Skatterådip aamma Akileraartarnermut Pisortaqarfiup digitaliusumik ingerlalnissaat anguniarneqarpoq, tassa akileraartarnermut oqartussaasut innuttaasunik digital atorlugu attaveqarsinnaanissaat siunertaralugu Naalackersuisut malittarisassiuussisinnaanissaanik piginnaatitsinissamik siunnersuuteqarnikkut.

Aningaasarsiat akileraaruteqaataasussat ilaatigut ineqarnermut tapiissutinik aamma meeqqanut tapiissutinik tunniussinissami taakku annertussusissaannik naatsorsuinermit tunngavigineqartarput, soorluttaaq meeqqanik paaqqinnittarfinniittuuteqarnermut akiliutinik aalajangersarneqarsimasunik akiliinissami akikillisaavigineqarsinnaanermut aalajangiisuusartut.

Isumaginninnermi tunniunneqartartut, tassa utoqqalinersiutit siusinaartumillu pensionisiat, piginnaanngorsaqqinneqarnermi sulinngiffeqarnermilu pissarsiat kiisalu ilinniagaqarnerisutit aningaasarsianut akileraaruteqaataasussanut ilaareerput. Taamaattumik annertussusileriikkamik aamma pisariaqartitsineq tunngavigalugu ikiutisiat taamatulli aningaasarsianut akileraaruteqaataasussanut ilaasariaqarnerat Naalackersuisut pissusissamisooruusaat.

Taamaattumik suliffissaarusimanermit napparsimanermilu annertussusileriikkamik ikiutisiat kiisalu pisariaqartitsinermik nalileereernikkut ikiutisiat tunngaviusumik tunniunneqartartut aningaasarsiat akileraaruteqaataasussat naatsorsorneqarneranni ilanngunneqartalnissaat siunnersuutaavoq, taamaallillutillu ineqarnermut tapiissutinik meeqqanullu tapiissutinik tunineqarnissap annertussusissaata kiisalu ulluunerani paaqqinnittarfinniittuuteqarnermut akiliutissat naatsorsorneqarneranni tunngavissamut ilaalerlutik. Annertussusileriikkamik ikiutisiat aamma tassaassapput aningaasarsiat A-t.

Siunnersuut annertussusileriikkamik ikiorsiissutinik aamma pisariaqartitsineq tunngavigalugu ikiorsiissutinik pissarsisartut aningaasat atorsinnaasaasa annertuumik appariaateqarnissaannik kinguneqarnaviangilaq, tassungami ilutigitillugu siunnersuutaavoq annertussusileriikkamik ikiorsiissutit, annertussusileriikkamik ikiorsiissutit pillugit peqqussut aqutigalugu aningaasarsiat minnerpaaffissaasa 90 pct.-iannut qaffanneqassasut, aammalu pisariaqartitsineq tunngavigalugu ikiorsiissutit, aningaasarsiat A-tut naatsorsuunneqartalissasuttaaq, akileraarutinit akiliuteqarnissamik kinguneqassanngitsut, tassami akileraarutissat tamarmiusut aningaasarsiat taakku akileraarutitaannut naapertuuttunik appartinneqartassammata.

Paasinarsimmat selskabit arlalippassuit kinguaariit nikinnerannut atatillugu aningaasanik annertuumik, aningaasatigut imminut nammassinnaanissaq anguniarlugu aningaasat selskabimi uninngasuutit ilanngullugit pisarineqartarnerat pissutigalugu selskabit ilarpassuisa ukiut tallimat tulliuuttut ingerlaneranni iluanaarutisianut ilanngaata atorsinnaasannikkaat. Taamaammat siunnersuutigineqarpoq, selskabip aningaasaatiminik appaanageranut atatillugu tamatumalu kingorna aningaasanik agguassippat iluanaarutisianit akileraarutit procenti, procenti selskabip akileraarfittut kommunerisaata akileraarusiissutigisaata tamarmiusup aammalu procentip selskabit akileraarutaata aalajangersarneqarsimasup assigiinngissutaat atorlugu unerartinneqartassasut. Iluanaarutisianit akileraarutip

procentia appasinnerulaartoq illuatungilerniarlugu siunnersuutigineqarpoq, selskabip iluanaarutisiatut agguanneqartut aningaasarsiami akileraaruteqaataasussat naatsorsorneranni ilanngaatigisinnaassanngikkai, tassa pisuni eqqartorneqartuni iluanaarutisianit akileraarutit naatsorsorneqartarnerannik allannguisoqaraluartoq selskabip iluanaarutisianit akileraarutinut akiligai selskabillu akileraarutaannut akiligai tamarmiusut allanngorujussuartaajunnaarlugit. Selskabip sulisorisat aktiaataannik utertitsilluni sulisorisanut allanut tuneqqinnissaat siunertaralugu pisigaangat imaluunniit selskabi aningaasanik niuerfimmi nalunaarsortissimasoq nammineq aktiaatiminik utertitsilluni pisigaangat iluanaarutisianit akileraarutit aamma assinganik unerartinneqartassapput.

Kiisalu siunnersuutigineqarpoq selskabi aningaasatigut ajutoorluni matuneqarneratigut pigisaanik nalilinnik tunisanit iluanaarutit, aktianik amerlanerussuteqartumik piginnittup pigisat nalillit selskabimut allamut tunisimappagit, selskabimi tassani aamma amerlanerussuteqartumik aktianik piginnittuuppat iluanaarutit nalilerneqartassapput. Iluanaarutisianit akileraarutit qulaani pineqartutulli unerartinneqartassapput.

Aningaasatigut sunniutissat.

Sumiiffinni ataasiakkaani, kommunet akornanni nunalu tamakkerlugu akileraartarnerup tungaatigut suleqatigiinnissamut periarfissat annertusinissaannik Naalakkersuisut siunnersuutaat kommunet aningaasartuutitigut sipaaruteqarsinnaanerannik kinguneqarsinnaavoq, kommunet ataasiakkaat akileraarutit tungaasigut suleqatigiikkumassusiisa qanoq annertutiginerat apeqqutaalluni. Naalakkersuisut KANUKOKA peqatigalugu 2003-mi nalilerpaat suleqatigiinnikkut, tassa suleqatigiinnerup qanoq annertutigisumik ingerlanneqarnissaa apeqqutaatillugu, aningaasartuutinut sipaarutaasinnaasut aammalu akileraarutitigut isertitassanut pitsannguutaasinnaasut ukiumut 15 mio. kr.-it tikillugit annertussuseqassasut.

Akileraarutinik angissusiliinernut atatillugu naammagittaalliortarnermi suleriaatsimik allannguinerit ataatsimut isigalugit piffissaq qaninnerusoq eqqarsaatigalugu missingersuutinut sunniuteqartussaannngitsut nalilerneqarput, Naalakkersuisummi naatsorsuutigaat naammagittaalliortarnermik pisariillisaanikkut aningaasat sipaarneqartussat akileraartarnerup tungaatigut pitsaanagerusumik suliniuteqarnissamut atorneqassasut. Piffissaq ungasinnerusoq eqqarsaatigalugu nalilerneqarpoq allaffissornermut aningaasartuutit nuna tamakkerlugu millioninik marlussunnik ikilisinnaajumaartut.

Kommuneni kommissionit akileraarusiisartut atorunnaarsinneqarnissaat kommunet aningaasartuutikinnerulernerannik kinguneqassaaq. Sipaarutaasussalli annertunissaat naatsorsuutigineqanngilaq, kommissioninimi akileraarusiisartuni ilaasortat akissarsiaqartinneqarneq ajorput, taamaallaalli sulinikkut isertitassaraluatik annaasatik immaqalu aamma angalanermut aningaasartuutitik kisiisa matussusertittarlugit. Sipaarutissat kommunemiit kommunemut allanngorassapput,

ataatsimiinnerit qanoq amerlatigisarsimani apeqqutaallutik. Naalackersuisut ataatsimut naliliippat sipaarutissat annerpaamik 500.000 kr.-it missaanniissasut.

Annertussusilerikkamik aamma pisariaqartitsineq tunngavigalugu ikiorsiissutinik allannguinnermut atatillugu Namminersornerullutik Oqartussat Kommunnillu bloktilskud-itigut isumaqatigiissutaanni ukiumut missangersuusiortiusumut 2005-imut, ilanngussaq 3, tapiissutit ikiorsiissutit aaqqissuunneqarneranut periutsit, erseqqinnerusumik annertussusilerikkamik ikiorsiissutit akileraarusersorneqalernissaanik kommunit karsiinut sunniuteqartitsinnginnissaanik, Naalackersuisut naatsorsuutigisaannik nalunaarussiaq.

Siunissaq eqqarsaatigalugu (2007-imiit) allannguuteqartitsineq missangersuusiortnernut ataasiakkaatigut iluaqutissaqarpoq, tassa akileraarusiisoqalernerata kingunerissammagu ataasiakkaanut aningaasarsiat akileraaruteqaataasussat annertuseriarnerinik kinguneqartitsissammat. Inaarummik naatsorsuusiortiusoq ilisimasaq kingullermik tunngaveqartumik aningaasarsiat akileraaruteqaataasussat aallaavigalugit meeqqanut tapiissutit, ineqarnermut tapiissutit, meeqqallu paaqqinnittarfiini akigititat aalajangersarneqaleraangata tunngavigineqartarput. Ukioq 2007-imiit sunniutissaa taanna, qanorluunniit pisoqaraluarpat, meeqqanut tapiissutinut ikileriaateqartitsinermik kinguneqartussaavoq aammalu pingaartumik ineqarnermut tapiissutinut aningaasartuutit annikillisinneqarneranik kinguneqartussaammat aammalu ataatsimut isigalugu meeqqanut paaqqinnittarfinnit pisortat karsiinut isertitsissutaanerulernissaanik kinguneqartussaammat.

Aktianik pisiortornermut il.il. atatillugu akileraarutitigut nikingassutaalersussaq sumiiffinni isertitassat assigiinngitsunik amerlassusilinnik qaffannissaannik, tassa nuna tamakkerlugu ukiumut 1 mio. kr.-it tikillugit amerlinissaannik kinguneqassanganneqarpoq.

Tassa imaappoq aningaasarsianit akileraarutit pillugit Inatsisartut inatsisaata allanngortinneqarnissaanik Naalackersuisut siunnersuutaat tamarmiisoq allaffissornikkut sipaaruteqarnermik, tassa suleqatigiinnerit qanoq annertutiginnissaat apeqqutaalluni, kiisalu isertitassat amerlinissaannik, tasanissaaq aamma suleqatigiinnissat ilaatigut apeqqutaallutik, kinguneqartussaavoq.

Allaffissornermut sunniutissat.

Inatsisissatut siunnersuutip allaffissornermut sunniutissaanut aalajangiisuussaaq kommunit akileraartarnerup tungaatigut qanoq annertutigisumik suleqatigiinnissaat, suleqatigiinnermi taamaattoq sulisut ikilineqarnissaannik nassataqarsinnaammat.

Inuussutissarsiuteqartunut il.il. allaffissornikkut aningaasatigullu sunniutissat.

Siunnersuutip kingunerisaanik inuussutissarsiuteqarnermut aningaasatigut allaffissornikkullu sunniuteqaateqannginnissaat naatsorsuutigalugu missangerneqarpoq.

Avatangiisinut pinngortitamullu sunniutissat

Inatsisissamut siunnersuut avatangiisinut pinngortitamullu sunniuteqaateqannginnissaa naatsorsuutaavoq.

Innuttaasunut allaffissornikkut sunniutissai

Inatsisissamut siunnersuut innuttaasunut allaffissornikkut sunniuteqaateqannginnissaa naatsorsuutigineqarpoq.

Tusarniaaneq.

Inatsisissatut siunnersuut makkununga tusarniaassutigineqarnikuuvoq: Ineqarnermut Attaveqarnermullu Pisorta qarfik, Aalisarnermut, Piniarnermullu Pisorta qarfik, Inuussutissarsiordernermut, Nunalerinerneqarnermullu Pisorta qarfik, Aatsitassanut Ikummatissanullu Pisorta qarfik, Allatto qarfik, Aningaasaqarnermut Pisorta qarfik, KANUKOKA, Kalaallit Nunaanni inuussutissarsiutit pillugit Siunnersuisoqatigiit, GrønlandsBanken A/S, Sparbank A/S, Advokatfirmaet Henrik Hey og Jens Paulsen. Advokatfirmaet Wilhelm Malling & Co., NUNA Advokater, Deloitte, PricewaterhouseCoopers, SIK, KNAPK, Kalaallit Nunaanni Sulisitsisut Peqatigiiffiat, ILIK aamma APK.

Maannamut periutsit naapertorlugit akileraartarnermut aamma akitsuusiisarnermullu ataatsimiititaliamut allaganngorlugit tusarniaanermut atatillugu akissuteqaatit isertut akissutissaannik sanasoqareerpoq.

Inatsisissatut siunnersuummi aalajangersakkanut ataasiakkaanut oqaaseqaatit

§ 1, nr. 1-imut

Iluanaarutisianit akileraarutip § 70 a-mi siunnersuutigineqartup appasinnerunera pissutigalugu selskabip iluanaarutit, iluanaarutisianit akileraarummik appasissumik unerartitsiffigineqarsimasut, selskabip aningaasarsiaasa akileraaruteqaataasussat naatsorsorneqarneranni ilanngaatigisinnaassanngikkai.

§ 1, nr. 2-mut

Allannguinerit kingunerisai tassani pineqarput.

§ 1, nr. 3-mut

Selskabip taassumalu aktiatigut piginnittuisa imaluunniit aktiatigut piginnittorilersinnaasaasa, aktianik tunisaqarnermut pisinermullu atatillugu imaluunniit selskabip ingerlataanik allannguiniarnermut atatillugu selskabimi amigartoorutaasimasinnaasut ilisimaneqartut ukiuni aningaasarsiorfiusuni tulliuttuni qaninnerni tallimani aningaasarsianit akileraaruteqaataasussanit ilanngaatineqarsinnaaneriniq erseqqissumik ilisimannittariaqarnerat paasinarsisimavoq. Taamaammatt siunnersuutigineqarpoq selskabi aktiaatillilluunniit pineqartut, akileraartarnermut oqartussaasut nalinginnaasumik akileraarusiinerminnut atatillugu apeqqummik taassuminnga aalajangiiffiginninnissaannik maannakkutuut utaqqisariaqaratik apeqqut taanna pillugu siumut akuersissummik allanngortinneqarsinnaanngitsumik Skatterådimit qinnuteqarsinnaanissaat, tassa selskabip aalajangerusukkaluarluni aalajangernermi akileraarutitigut kinguneriumaagassaanik paasinninnissaanut maannakkut qaammatit 20-t ingerlaqqaarsinnaasarmata.

Naatsorsuutigineqarpoq Skatterådi suliassamik suliarinninnerminut atatillugu kommunemi selskabip angerlarsimaffittut kommuneani akileraaruseriffimmut oqaaseqaammik pissarsiniartassasoq, suliassanili taamaattuni siumut akuersissummik allanngortinneqarsinnaanngitsumik piaartumik tunniussaqaarnissaq pingaartuummat, oqaaseqaammik taamaattumik pissarsiniartarnissaq pinngitsoorani pisussanngortinneqanngilaq. Skatterådip siumut akuersissutaa allanngortinneqarsinnaanngitsoq kommunemi akileraaruseriffiup selskabimik kingusinnerusukkut akileraarusiinermini allanngortissinnaanngilaa. Siumut akuersissummik allanngortinneqarsinnaanngitsumik pissarsisup aalajangiineq Kalaallit Nunaata Eqqartuussivianut § 59, imm. 1-imi maleruagassat naapertorlugit suliassanngortissinnaavaa.

Amigartooruteqaataasinnaasut ukiunut aningaasarsiorfiusunut tullernut nuunneqarsinnaannginneri pillugit siumut allanngortinneqarsinnaanngitsumik Skatterådimit akuersissummik pissarsisup, Naalakkersuisut § 21, imm. 5-imi aalajangersagaq malillugu tamakkiisumik ilaannakortumilluunniit akuersissuteqaarnissaat immikkut ittunik pissutissaqartillugu qinnutigisinnaavaa.

§ 1, nr. 4-mut

Pisortanit ikiorsiissutit aalajangersakkami taaneqartut aningaasarsiat akileraaruteqaataasussat naatsorsorneqarneranni suli ilanngullugit naatsorsuunneqartassanngillat. Ikiorsiissutit pineqartut tassaapput:

Ikiorsiissutit, pisuni ataasiakkaani naliliineq tunngavigalugu pisortanit pensionisiant tapiliussat, matumani aamma pisortat pensionisiat pillugit Inatsisartut peqqussutaat

nr. 9, 15. april 2003-imeersoq naapertorlugu meeqqanut tapiliussatut tunniunneqartut ilanngullugit.

Ikiorssiissutit, annertusisamik pisariaqavissuinnarnut ikiorssiissutit, matumani aamma pisortat pensionisiat pillugit Inatsisartut peqqussutaat nr. 10, 1. November 1982-imeersoq naapertorlugu ataasiartumik ikiorssiissutit, nuunnerni ikiuutisiatut, ilisinermi ikiuutisiatut, angerlarsimaffimmi ikiorteqarnermut aamma angerlarluni angalanermut ikiuutisiatut tunniunneqartut ilanngullugit.

Ikiorssiissutit, ineqarnermut tapiissutit pisortat inissiaataanni attartortittakkani Inatsisartut peqqussutaat nr. 3, 31. maj 2001-imeersoq naapertorlugu tunniunneqartut ilanngullugit.

Ikiorssiissutit, meeqqanut inuusuttunullu ikiorssiissutit Inatsisartut peqqussutaat nr. 1, 15. april 2003-imeersoq naapertorlugu meeqqanut inuusuttunullu tunniunneqartut ilanngullugit.

Ikiorssiissutit, inunnut annertuumik innarluuteqartunut Inatsisartut peqqussutaat nr. 7, 3. November 1994-imeersoq naapertorlugu inunnut annertuumik innarluuteqartunut ikiorssiissutit tunniunneqartut ilanngullugit.

Ikiorssiissutit, innarluuteqalernerne Inatsisartut peqqussutaat nr. 4, 31. maj 2001-imeersoq naapertorlugu piginnaanngorsaqinnermut atatillugu ataasiartumik ikiorssiissutit immikkut ittumik tapiissutit tunniunneqartut.

Aalajangersakkap oqaasertaata allanngortinneqarnissaanik siunnersuutip kingunerissavaa annertussusileriikkamik ikiorssiissutit, annertussusileriikkamik ikiorssiissutit pillugit Inatsisartut peqqussutaat naapertorlugu tunniunneqartartut kiisalu pisariaqartitsinermik nalileereernikkut ikiorssiissutit, pisortanit ikiorssiissutit pillugit Inatsisartut peqqussutaanni kapitali 5 naapertorlugu tunniunneqartartut, pisortanit pensionisiant, naartunermut, erninermut meeravissartaarnermullu atatillugu ullormusianut kiisalu piginnaanngorsaqinneqarnermi ikiuutisiant atuutereersoq assigalugu aningaasarsiat akileraaruteqaataasussat naatsorsorneqarneranni ilanngunneqartalernissaat, taamaattorli tak. § 34 c siunnersuutaammat.

§ 1, nr. 5-imut

Siunnersuutigineqartutuut pisortanit pisariaqartitsinermik nalileereernikkut ikiorssiissutit akileraaruteqaataalernissaasa pisortanit ikiorssiissutit allat assigalugit ikiorssiissutit tunniunneqartut naatsorsorneqarneranni ilanngunneqarnissaat siunertaammat, siunnersuutigineqarpoq inuit, pisortanit ikiorssiissutit pillugit Inatsisartut peqqussutaanni maleruagassat naapertorlugit pisariaqartitsinermik nalileereernikkut ikiorssiissutinik pissarsisartut akileraarutissaasa tamarmiusut, pisariaqartitsineq tunngavigalugu ikiorssiissutit aningaasarsiat akileraaruteqaataasussat naatsorsorneqarneranni ilanngunneqartussat akileraarutitaannut naapertuuttumik annertussusilimmik appartinneqartarnissaat

siunnersuutaavoq. Pisariaqartitsinermik nalileereernikkut ikiorsiissutit aningaasarsiatut A-ngortinneqaraluartut tunniunneqarneranni akileraarutinik A-nik unerartitsisoqassanngilaq.

§ 1, nr. 6-imut

Akileraartarnermut allagartamik sulisitsisumut tunniussinngitsoornerup akilersinnaannginnissaa pissutigalugu siunnersuutigineqarpoq siunissami taamaaliortoqartillugu ilanngaataitaqanngitsumik 45 procentimik aamma tunisinermi isertitaagaangata 23 procentimik unerartitsisoqartassasoq.

§ 1, nr. 7-imut

Kommissionit akileraarusiisartut atorunnaarsinneqarnissaannik siunnersuuteqarneq pissutigalugu siunnersuutaavoq kommissionip akileraarusiisartup siumoortumik nalunaarsuinermik suliaqarsinnaatitaanerata akileraaruseriffimmut nuunneqarnissaa.

§ 1, nr. 8-mut

Kommissionit akileraarusiisartut atorunnaarsinneqarnissaannik siunnersuuteqartoqarnera pissutigalugu siunnersuutaavoq kommissionit akileraarusiisartut siumoortumik nalunaarsuummik allannguisinnaatitaanerata kommunini akileraaruseriffinnut nuunneqassasoq.

§ 1, nr. 9-mut

Siunnersuutigineqarpoq kommunini akileraarusiinissaq aammalu Akileraartarnermut Pisorta qarfiup ukiumi pineqartumi nakkutilliinissaa pillugit nuna tamakkerlugu tunngaviumik pilersaarusiaq Skatterådimit suliarineqartassasoq.

Akileraarusiinissami pilersaarut suleriaasissanik Skatterådimit aalajangersarneqartunik pingaarnernik imaqassaaq. Akileraarusiinissami pilersaarutip taassuma saniatigut ilaatigut imarissavai akileraartartut aalajangersimasut pingaarnertullugit misissuiffigineqartussat toqqarneqarnissaannut periusissat, nammineerluni nalunaarsuiffiit misissoqqissaagassat qassiunissaat, akileraarusiinernik kukkunersiuinernillu nakkutilliinissamik pilersaarutip allaaserineqarnera, matumani ilanngullugu suliffeqarfinnut nakkutilliilluni pulaarneq.

Aammattaq siunnersuutaavoq kommunalbestyrelsi kommunimi akileraarusiilluni sulinermi qullersaalluni akisussaasuussasoq, aammalu kommunalbestyrelsi tassaassasoq akileraarusiinissaq pillugu Skatterådip pilersaarusiaata malinneqarnissaanut akisussaasuussasaq. Akileraarusiinivik kommunalbestyrelsip akisussaaffigissanngilaa, taamaattumillu akileraarusiinermi suliassanik

suliaqartussaananani. Tamanna kommissionit akileraarusiisartut atorunnaarsinneqarnissaannik siunnersuuteqarnermik pissuteqarpoq.

Aammattaq siunnersuutaavoq kommunalbestyrelsi inummik kommunimi atorfeqartumik, kommunimi akileraartarnermut oqartussaasut akileraarusiineramik suliaqarneranni, matumani aamma siumoortumik nalunaarsuinermi il.il, qullersaalluni akisussaasuusussamik toqqaassasoq. Tamanna kommunalbestyrelsep kommunimi akileraartarnermut oqartussaasut aalajangiinerinik isummerfiginnissinnaatitaannginneranik pissuteqarpoq.

Atorfillip aalajangersimasuunissaa, soorlu kommunimi akileraartarnermut pisortaanissaa piunasaqaataangilaq, tamannalu kommunalbestyrelsep namminerisamik ingerlatsiviliorsinnaaneramik pissuteqarpoq. Tassa imaappoq kommunalbestyrelsep nammineq aalajangigassaraa inuup toqqarneqartup akileraarusiineramik suliaqartuunani kommunimi sulianik allanik suliaqartuunissaa.

Kommunit aggornerisa avataanniittunut tunngatillugu Akileraartarnermut Pisortaqarfiup inuk pisortaqarfimmi atorfeqartoq, pisortaqarfiup akileraarusiineramik suliaqarnerani, matumani aamma siumoortumik nalunaarsuinermi il.il., kiisalu akileraarusiinnisaaq pillugu Skatterådip pilersaarusiata malinneqarnissaanut qullersaalluni akisussaasuusussaaq toqqaassavaa.

§ 1, nr.10-mut

Siunnersuutigineqarpoq kommunalbestyrelset kommunini akileraarusiineramik suliaqarneranni taakkualuunniit ilaannik suliaqarnissami ataatsimoorussamik kommunit akileraaruseriffissaannik pilersitsisinnaassasut, inummillu kommunit arlaanni atorfeqartumik, akileraarusiinermut qullersaalluni akisussaasuusussamik ataatsimoorlutik toqqaassasut. Kommunilbestyrelset ataasiakkaat akileraarusiinermut akisussaanerat tassuunakkut allannguuteqassanngilaq.

Taamatut ataatsimoorutitsinissami sulisorisatigut, tassa amerlassusiisigut piginnaasaasigullu pisariaqartitat pigineqarnissaat qulakkeerniarlugu siunnersuutigineqarpoq, taamatut ataatsimoorussamik akileraaruseriffik Naalakkersuisunit akuersissutigineqassasoq, soorluttaaq akuersissuteqarnermut tunngavusut atuukkunnaarsimasut Naalakkersuisunit nalilerneqarpata Naalakkersuisut akuersissutertik atorunnaarsinnaassagaat.

Akileraarusiinermi akisussaasuusussamik ataatsimoorussamik toqqaasinnaaneq akileraarusiinermi akisussaasuusup suliaqaannik agguasinnaanermik imaqaanngilaq. Akileraarusiinermi akisussaasuusup ataatsimoorussap kommunini akileraartarnermut oqartussaasut akileraartartunut, suleqatigiinnermi pineqartunut tunngatillugu pisinnaatitaaffii tamaasa pisinnaatitaaffigissavai. Kisianni kommunit nammineerlutik aalajangersinnaavaat akileraartartut aalajangersimasut kisiisa suleqatigiinnermi pineqarnissaat, soorlu selskabit aamma namminersorlutik inuussutissarsiuteqartut.

Suleqatigiinnissamut periarfissap taassuma kommunalbestyrelset ataasiakkaat, akileraarusiinissamik pilersaarutip Skatterådimit suliarineqarsimasup malinneqarnissanut akisussaasuujunnaarsinngilai.

§ 1, nr. 11-mut

Siunnersuutaavoq kommunalbestyrelsep ataatsip kommunalbestyrelselluunniit arlaqartut Naalackersuisut akuersisereerlugit kommunini akileraarusiinermik suliasat taakkuluunniit ilaat Akileraartarnermut Pisortaqarfimmut nuussinnaassagaat. Taamaaliortoqassappat akileraarusiinermut pilersaarutip Skatterådimit suliarineqartup malinneqarnissaa Akileraartarnermut Pisortaqarfiup akisussaaffigissavaa.

Akileraarusiinerup pitsaasuunissaa eqqarsaatigalugu aamma siunnersuutaavoq Akileraartarnermut Pisortaqarfiup, kommunimi akileraaruseriffiup kommunellu ingerlatsiveqarfiisa allat paasissutissanik akunnerminni tunniusseqatigiittarnerattuulli kommunimi ingerlatsiveqarfiit allat tunniusseqatigisarsinnaassagai.

§ 1, nr. 12-mut

Aalajangersakkat siunnersuutigineqartut § 51, imm. 2-miit imm. 5-imut aalajangersakkat assigaat.

§ 1, nr. 13-imut

Akileraartarnermut oqartussaasut innuttaasullu pilertornerusumik attaveqatigiissinnaanissaat kiisalu piffissaq ungasinnerusoq eqqarsaatigalugu immersugassatigut il.il. sipartoqarsinnaanera eqqarsaatigalugit siunnersuutigineqarpoq, Naalackersuisut digital atorlugu attaveqarsinnaaneq pillugu maleruagassanik aalajangersaasinnaassasut.

§ 1, nr. 14-imut

Maannamut atuuttutuulli siunnersuutigineqarpoq akileraarutissanik angissusiliinerup ukiumi akileraarusiiffimmi, tassa imaappoq ukiup aningaasarsiorfiusup angissusiliiffigisap tulliani kingusinnerpaamik ulloq 1. septemberimi naammassineqarsimanissaa. Akileraarusiinermik sulineq eqaatsuutinniarlugu pitsaasuutinniarlugulu siunnersuutigineqarpoq akileraaruseriffiit angissusiliinermik, nakkutilliinermi paasissutissat uppersaatissalluunniit il.il. kingusinnerusukkut takkuttut tunngavigalugit ukiup aningaasarsiorfiusup pineqartup qaangiunnerata kingorna, piffissami 2. septemberimiit qaammatsiutit malillugit ukiup tulliani 1. september tikillugu nammineerlutik suliareqqiisinnaassasut.

Aningaasarsianik angissusiliisimanernik suliareqqiisinnaanernik siunnersuut § 63, imm. 4-mi aalajangersakkamik, tassa akileraarutissat sippuutigisimasinnaasaasa akileraartussaataasumut ukiumi akileraarusiiffimmi kingusinnerpaamik 1. septemberimi utertinneqarsimanissaannik imaqtartumik allannguuteqartitsingilaq.

Aamma akileraarutissanik angissusiliisimanerup nutaamik naliliiffigalugu suliareqqinneqarsinnaanissaani piumasaqaataavoq angissusiliinerup Skatterådimit isummerfigineqarsimannginnissaa suliarissalluguluunniit tigummineqannginnissaa. Kommunimi akileraartarnermut oqartussaasut akileraarutissanik angissusiliisimappata, taannalu Skatterådimit naammagittaalliuutigineqarsimappat, taava kommunimi akileraartarnermut oqartussaasut angissusiliinerup tunngatillugu naammagittaalliuutigineqartoq allanngortissinnaanngilaat. Tamanna aamma atuuppoq suliaasaq Skatterådimit aalajangiiffigineqarsimappat. Taamatuttaaq aamma kommunimi akileraartarnermut oqartussaasut angissusiliineq allanngortissinnaanngilaat suliaasaq Skatterådimit kukkunerisugassanngorlugu tiguneqarsimappat.

Kommunimi akileraartarnermut oqartussaasut akileraarutissanik angissusiliinerup suliaqarnissamut allanngortitsinissamulluunniit Skatterådimit piginnaatinneqarsinnaanissaannik siunnersuut ilaatigut pisuni akileraartussaataasup naammagittaalliuuteqarnermini qularnaatsumik ilumoornerani atorneqartussatut eqqarsaataavoq. Taamaalilluni piffissaq naammagittaalliorfiusoq sivitsorneqassanngilaq, tassami aalajangiinissaq Skatterådip ataatsimiinnissaanut utaqqinneqartariaqassanngimmat.

Kommunimi akileraartarnermut oqartussaasut inuit inuttullu isigineqarsinnaasut, tassa imaappoq inuit, inuit toqusimasut, aktieselskabit, anpartsselskabit, aningaasaateqarfiit, peqatigiiffiit il.il., akileraarutissaannik angissusiliisartussaapput.

Kommunimi akileraartarnermut oqartussaasut aningaasarsiat nammineerluni nalunaarutigineqartut akuerisinnaanngippatigit akileraartarnermut oqartussaasut, aningaasarsiat nammineerluni nalunaarutigineqartut allanngortinniarneqarnerat pillugu akileraartussaataasumut allagaqassapput. Akileraartussaataasooq ilisimatinneqassaaq aningaasarsianut nammineerluni nalunaarutigineqartunut allannguutigittinniakkatut siunnersuutigineqartut, akileraarusiinerup oqartussaasut piffissaliussaata sapaatit akunnerinik sisamanik sivikinnerunngitsup ingerlanerani allakkatigit oqaasiinnakkulluunniit oqaaseqarfigisinnaagai. Akileraartussaataasooq suliamik suliaqartumut allakkatigit oqaasiinnakkulluunniit oqaaseqaateqarpat pineqartoq suliap aalajangiiffigineqarneranik allakkatigit ilisimatinneqassaaq, tassa akileraarutissanik angissusiliinivik pillugu. Akileraarutissanik angissusiliineq akileraartussaataasup kissaataanut tamakkiisumik naapertuutinngippat tunngavilersorneqassaaq naammagittaalliornissamullu ilitsersuummik imaqaalluni, tak. Sulianik ingerlatsineq pillugu inatsimmi §§-it 22 aamma 25. Allannguiniarluni allagaq akileraartussaataasup akissuteqarfiginngippagu kommunimi akileraarusiinerup oqartussaasut, akileraartussaataasooq tamatuminnga ilisimateqqaanngikkaluarlugu akileraarutissanik angissusiliiniarluni allakkiaq naapertorlugu akileraarutissanik angissusiliisapput.

Aalajangersakkat taakku aamma atuupput nammineerluni nalunaarsuiffik pissusissamisoortoq tiguneqarsimannikkaangat. Nammineerluni nalunaarsuiffik pissusissamisoortuunngitsoq tassaavoq nassiunneqarsimanngitsoq imaluunniit assersuutigalugu namminersorluni inuussutissarsiuteqartup suliffeqarfiutaata naatsorsuutai ilanngunneqarsimanngitsillugit.

§ 1, nr. 15-imut

Skatterådip suliassarai kommunini akileraartarnermut oqartussaasut aalajangiinerinut naammagittaalliuutit. Skatterådimit naammagittaalliuut allakkatigoortuussaaq, aalajangiinerlu naammagittaalliuutigineqartoq ilanngunneqarsimassaaq, imarissavaalu aalajangiinerup sutigut eqqunngitsuusorineqarnera tassungalu tunngavilersuut, taakkuali qanoq pitsaatiginissaannut annertunerusumik piomasqaateqartoqarsinnaanngilaq. Aamma allakkiat uppernarsaatit atorumaneqartut naqeqqaarneqarneri assilineqarneriluunniit naammagittaalliummut ilanngunneqassapput.

Naammagittaalliuut eqqortumik ilusiligaanngippat tunngavilersorneqarsimanngippalluunniit Skatterådip naammagittaallioortoq piffissalersinnaavaa naammagittaalliummi amigaataanik aaqqiissuteqarnissamut. Naammagittaallioortup amigaataasoq piffissaliussap iluani aaqqiissuteqarfingngippagu naammagittaalliuut itigartinneqassaaq.

Naammagittaalliuut angissusiliinerup naammagittaalliuutigineqartup ullormit ilisimatitsissutigineqarfianiit kingusinnerpaamik sapaatip akunneri sisamat qaangiutsinnagit Skatterådimit tiguneqarsimassaaq. Skatterådip piffissaliussap qimmorneqarnera isiginngitsuusaarsinnaavaa, rådip suliani ataasiakkaani erseqqissumik nalileereerluni isumaqarpat suliassaq suliarineqartariaqartoq.

Skatterådip kommunimi akileraaruseriffik angissusiliinermik naammagittaalliuutigineqartumik suliaqarsimasoq oqaaseqaateqartissavaa, soorluttaaq rádi aalajangiinnginnermini suliamut saqqummiussissummik suliaqassasoq.

Suliamut saqqummiussissut minnerpaamik makkuninnga imaqassaaq:

- * kinaanermut paasissutissat
- * naammagittaalliuutigineqartunut ataasiakkaanut kisitsisitigut naatsorsukkat nammineerluni nalunaarutigineqartut angissusiliinerullu nikingassutaannik takutitsisut
- * naammagittaalliuutip imarisaa naammagittaalliuutigineqartut immikkoortinneqarnerannik imaqartoq
- * pissutsit suliassamut tunngassuteqartut erseqqissumik nassuiarneqarnerat
- * inatsisini maleruagassat soqutiginaatillit innersuussutigineqarnerat
- * periusissanut allattorneqarsimasunut periusiviusunullu soqutiginaatilinnut innersuussineq

Naammagittaalliuutigineqartoq Skatterådimit tamakkiisumik ilalersorneqanngitsillugu, taava suliamik saqqummiussissut suliap aalajangerneqarnissaanut siunnersuummik ilaqartillugu naammagittaallortumut nassiunneqassaaq, piffissaliussap erseqqinnerusumik ullulernerqarsimasup sapaatit akunnerinik sisamanik sivikinnerunngitsup iluani siunnersuummut oqaaseqaateqarnissamik kajumissaarlugu. Aammattaaq naammagittaallortoq ilisimatinneqassaaq Skatterådimit oqaasiinnakkut oqaaseqaateqarnissaminut periarfissaqartoq. Naammagittaallortoq akissuteqanngippat suliaq paasisutissat pigineqartut tunngavigalugit aalajangiiffigineqassaaq.

Naammagittaallortoq suliamik saqqummiussissuummut oqaaseqaateqarpat imaluunniit Skatterådimit oqaasiinnartigut oqaaseqaateqarusuppat, oqaaseqaatai suliamik saqqummiussissuummut ilanngunneqassapput, aalajangiivittoqartinnagulu Skatterådimit saqqummiunneqassallutik.

§ 1, nr. 16-imut

Aalajangersakkap Skatterådip kommunit akileraarutissanik angissusiliinerinik kukkunersiuisinnaaneranut maleruagassat maannakkut atuuttut assigai.

Pingaarnertut atuuttoq tassaavoq, Skatterådip angissusiliineq missingersuinikkut suliaasimatillugu imaluunniit angissusiliinerup ilai missingersuinikkut suliaasimatillugit, aammalu ukiup aningaasarsiorfiusup pineqartup qaangiunneraniit ukiut tallimat qaangiutereersimatillugit suliassaq suliareqqissinnaanngimmagu.

Suliassat pisoqalisarnerat pillugu inatsimmi 1908-imeersumi piffissaliussaq nalinginnaasoq ukiunik tallimanik sivisussuseqartoq angissusiliinernut allanut tamanut atuuppoq, atuunnani akileraartarnermut oqartussaasut akileraarutitigut pisassarisatik ilisimasimanngippatigik, soorlu akileraartussaataasup pineqartup aningaasarsiami ilaanik ilanngussisimannginna pissutigalugu.

§ 1, nr. 17-imut

Akileraartartup Skatterådimit naammagittaalliornerminut atatillugu oqaasiinnartigut oqaaseqaateqarsinnaanissaanik siunnersuuteqartoqarmat, tamannalu oqarasuaatikkut video-kkulluunniit ataatsimiinnikkut pisinnaammat, akileraartussaataasup immikkut ittunik pissuteqartoqartillugu Skatterådimit oqaloqatiginninnermigut isumaqatigiinniarnissamik qinnuteqarnerani, akileraartussaataasup angalanermut aningaasartuutaasa tamakkiisumik ilaannakuusumilluunniit matussuserneqarsinnaanerannik Naalakkersuisut aalajangersaasinnaanerannik aalajangersakkap atorunnaarsinneqarnissaa siunnersuutaavoq.

§ 1, nr. 18-imut

Maannamut inatsimmi atuuttutuulli siunnersuutigineqarpoq akileraartussaataitaasup aamma Naalakkersuisut Skatterådip aalajangiinerinik Kalaallit Nunaata Eqqartuussivianut, suliarinnittussamut siulliusumut suliakkiissuteqarsinnaanissaat. Selskabip piginnittuisa imaluunniit selskabip ingerlataasa allannguuteqarnerannut atatillugu, selskabip amigartoorutaasa ukiunut tulliuttunut nuunneqarsinnaaneratt pillugu Skatterådip siumut akuersissutaanik allangortinneqarsinnaanngitsumik qinnuteqartoqarsinnaanissaanik siunnersuuteqarneq pissutigalugu siunnersuutigineqarpoq, akileraartussaataitaasup siumut akuersissut allangortinneqarsinnaanngitsoq taamaattoq Kalaallit Nunaata Eqqartuussivianut, suliarinnittussamut siulliusumut suliakkiissutigisinnaassagaat.

Naalakkersuisut Kalaallit Nunaata Eqqartuussivianut siumut akuersissummik allangortinneqarsinnaanngitsumik suliakkiissuteqarsinnaanngillat, tassami siumut akuersissummik allangortinneqarsinnaanngitsumik nalunaaruteqartoqarsinnaanerannut siunertaasup piumasaqaatai atuutsinneqassanngimmata, imaassagaluarpatt akileraartussaataitaasoq qaammatit arfinillit angullugit tusartinneqarnissaminut utaqqisinneqassappatt, Naalakkersuisut siumut akuersissummik allangortinneqarsinnaanngitsumik akuersissuteqarpata imaluunniit akuersissuteqanngippata.

Suliakkiisinnanermut piffissarititaq qaammatinik arfinilinnik sivisussuseqartoq sivisungaatsiartutut isigineqartariaqarmatt siunnersuutigineqarpoq, piffissarititap ullormit aalajangersimasumit aallartittumik, tassalu ullormit Skatterådip aalajangiiffigisaaniit naatsorsorneqartarnissaa, tassa maannakkut piffissaliussaasartumik akileraartussaataitaasup Skatterådip aalajangiineranik allakkatigut tigussiffianiit naatsorsuisarnermut taarsiullugu.

Piffissaq naammagittaalliorfiusoq sivikillisinniarlugu siunnersuutaavoq akileraartussaataitaasup, suliasaq naammagittaalliuutigineqartoq piffissap qaammatinik 12-inik sivisussuseqartup ingerlanerani Skatterådimit aalajangiiffigineqarsimanngippatt, naammagittaalliuut Kalaallit Nunaata Eqqartuussivianut, suliarinnittussamut siulliusumut suliakkiissutigisinnaassagaa.

§ 1, nr. 19-imut

Selskabini aktianik amerlanernik piginnittuusut selskabiutiminni aningaasanik tigoriaannarnik annertuunik peqartut selskabinik nutaanik, pigisat tunineqarfigisaannik pilersitseriarlutik selskabinik nutaanngitsunik atorunnaarsitsisalersimanerat paasinarsisimavoq. Aktianik amerlanernik piginnittup suliffeqarfutini taamaaliornermigut ingerlatiinnarsinnaavaa, tassungali ilutigitillugu aamma selskabip atorunnaarsinneqartup aningaasaatai tigoriaannaat, iluanaarutisianit akileraarutinik unerartitsiffiunngitsumik atugassariinnarsinnaallugit.

Taamaattumik siunnersuutaavoq taamatut pisoqarnerani atorunnaarsitsinermi agguanneqartut aktianik amerlanernik piginnittuusumut iluanaarutitut isigineqassasut, selskabillu atorunnaartussap iluanaarutit, tamakku pillugit

maleruagassat § 70 a-mi nalinginnaasut naapertorlugit iluanaarutisianit akileraarutininik unerartitsiffigalugillu taakkuninnga akiliissasoq.

Iluanaarutisiat, iluanaarutisianit akileraarutininik unerartitsiffiussappata taakku maleruagassani § 14 imm. 3 naapertorlugu naatsorsorneqassapput.

Aktiaatillit, aktianik amerlanernik piginnittuunngitsut, ullumikkut pisarneq malillugu atorunnaarsitsinermini agguanneqartunit akileraartinneqassanngillat.

§ 1, nr. 20-imut

Aktiatigut aningaasaatit minnerpaamik 25 pct.-iinik piginnittuusimaneq imaluunniit taasisinnaatitaanerup minnerpaamik 50 pct.-ianik pigisaqarsimaneq pillugit aalajangiiniarluni selskabip aktiatigut aningaasaataanik taasisinnaatitaanermillu naatsorsuinermini selskabip nammineq aktiaatitigut pigisai ilanngunneqassanngillat. Aktianik amerlanernik pigisaqartuusup taasisinnaatitaanerup 50 pct.-ii sinnerlugit taasisinnaatitaasimanermik aalajangiiniarnermi, apeqqutaanngilaq aktianik aktiat taasisinnaatitaaffimmik ilaqartut kimit pigineqarnerisut, apeqqutaallunili kina taasisinnaatitaanermik pigisaqarsimaneq.

§ 1, nr. 21-mut

Selskabip iluanaarutisianit akileraarutininik unerartitsinermini procenti kommuniip angerlarsimaffigisap akileraarusiissutaa tamarmiusoq atorlugu unerartitsisussaanera aammalu selskabip iluanaarutininik agguanneqartunik aningaasarsiami akileraaruteqaataasussat naatsorsorneqarneranni ilanngaateqarsinnaanera pillugit maleruagassat maanna atuuttut kinguaariit nikinnerannut atatillugu aningaasaatinik agguaaassisooqartillugu, sulisuusoq sulisutut aktiaatiminik selskabimut aktianik pilersitsisuusumut tunisaqartillugu aammalu selskabi aningaasanik niuerfimmi nalunaarsortissimasoq aningaasanik niuerfimmi nammineq aktiaatiminik utertitsilluni pisinissamik aalajangertillugu naleqqutinngitsuunerat paasinarsisimavoq.

Taamaattumik siunnersuutigineqarpoq selskabi taamatut pisoqartillugu iluanaarutisianit akileraarummik appasinnerusumik unerartitsisassasoq, tassa procentit kommuniip angerlarsimaffigisap akileraarusiissutigisaasa tamarmiusut aammalu selskabinut akileraarutip sukkulluunniit atuuttup, maannakkorpiaq 35 pct.-iusup assigiinngissutaattut annertutigisumik. Selskabi pineqartoq aatsitassarsiornermik ingerlassaqartuuppat, taava selskabit taamaattut akileraarutaat maannakkorpiaq taamaallaat 30 pct.-iuvoq. Iluanaarutisianilli akileraarummik appasinnerusumik taassuminnga atuinermini selskabip aningaasarsiami akileraaruteqaataasussat naatsorsorneqarneranni, tak. § 19, imm. 2, iluanaarutininik taamaattunik ilanngaatiginnissinnaannginnissaa siunnersuutigineqarpoq.

Selskabit akileraarutaat 35 pct.-iuppat iluanaarutisianit akileraarut aalajangersagaq taanna malillugu 2 aamma 11 pct.-ip akornannik annertussuseqassaaq, kommuni selskabip akileraarfittut kommunerisaa sorliunersoq apequtaalluni.

Aalajangersagaq naatsorsuutigineqarpoq selskabini sulisorisat aktiaataannik utertitsilluni sulisunut allanut tuneqqitassanik pisisoqartillugu pisariaqarfiini atugassiaavoq. Selskabip sulisorisat aktiaataannik utertitsilluni pisinerani iluanaarutisianit akileraarutip appasinnerusup atorneqarnissaani piumasaqaataavoq, selskabip aktiat utertillugit pisiani nammineq aktiaatigisimasinnaasaminit naatsorsuutigut immikkoortissimassagai.

Aalajangersakkap paasineqarnissaatuut kinguaariit nikinnerat tassaavoq aktiatigut aningaasaatit amerlanersaasa aktiaatilimmut ataatsimut aktiaatilinnulluunniit arlaqartunut tunineqarnerat. Siusinnerusukkut aktiaateqartup ataatsip arlaqartulluunniit aktianik ikinnerusunik peqaannarnissaat akornutissaqanngilaq.

Selskabip aningaasanik niuerfimmi nalunaarsortissimasup nammineq aktiaatiminik utertitsilluni pisinerani iluanaarutisianit akileraarutip appasinnerusup atorneqarnissaani piumasaqaataavoq, nammineq aktiaatinik utertitsilluni pisinissap selskabip ileqquusumik ataatsimeersuarnerani aalajangiunneqarsimanissaa.

§ 1, nr. 22-mut

Siunnersuutigineqarpoq iluanaarutisianik akileraarutitut tunngatillugu akiliinissamut killiliussaq qaammat ataasiusoq, aningaasanik agguaassinermi iluanaarutaappat, nalunaaruteqarnermi killiliussap naaneraniik naatsorsuunneqassaaq maannakkumullu aningaasanik agguaassinissap aalajangerneqarneraniit piffissamik killiliisarneq atorunnaarlugu.

§ 1, nr. 23-mut

Siunnersuutaavoq akileraartussaataasup § 3 naapertorlugu akileraartussaataanngitsup akileraarutitut akilikkani aamma utertissinnaassagai, pineqartoq iluanaarutitik iluanaarutisianit akileraarutitik § 70 imaluunniit § 70 a naapertorlugu unerartitsiffigineqarsimasunik pissarsisimappat, taamaattorli peqatigiiffiit suleqatigiillunilu iluanaarniaqatigiiffiit inuussutissarsiummik ingerlassaqarnermikkut isertitaannarminnit akileraartussaataasut, tak. § 1, imm. 1, nr. 12 eqqarsaatigalugit nalinginnaasumik allaassutaassalluni taakku § 3, imm. 2 naapertorlugu akileraartussaataanngikkaluarlutik iluanaarutisianit akileraarummik utertitsiffigineqarsinnaannginnissaat.

§ 1, nr. 24-mut

Aalajangersagaq §§-it 86-imi 87-imilu nakkutilliilluni aalajangersakkat atuuttuusut ataatsimoortinneqarneraat.

Imm. 1-imi aalajangersakkatut nutaatut ilanngunneqarpoq, nassiussisussaataaernerup aammattaaq akileraartussaataasup nunami allami ingerlatsivianit aningaasarsianit akileraaruteqaateqartussamit naatsorsuutitut takussutissiat il.il ilanngunneqassasut, tassami aningaasarsiat akileraaruteqaataasussat naatsorsorneqarneranni nunami allami isertitaasut ilanngullugit naatsorsuunneqassammata, tak. § 13, imm. 1.

Imm. 5-itut nutaatut ilanngunneqarpoq akileraartarnermut oqartussaasut paasissutissanik naatsorsuutitut tunngasunik takunnissinnaatitaanerisa paasissutissanik qarasaasiatigut nalunaarsorneqarsimasunik ilaqartinneqarnissaanik aalajangersagaq.

§ 1, nr. 25-mut

Allannguinerup kingunerisaa tassani pineqarpoq.

§ 1, nr. 26-mut

Kommissionit akileraarusiisartut atorunnaarsinneqarnissaannik siunnersuuteqarneq pissutigalugu siunnersuutaavoq aalajangersakkap atorunnaarsinneqarnissaa.

§ 1, nr. 27-mut

Aalajangersakkami Kommissionit akileraarusiisartut atorunnaarsinneqarnissaannik siunnersuuteqarneq pissutigalugu, allannguinerup kingunerisaa tassani pineqarpoq.

§ 1, nr. 28-mut

Kommissionit akileraarusiisartut atorunnaarsinneqarnissaannik siunnersuuteqarneq pissutigalugu siunnersuutaavoq, piginnaatinneqarluni namminerisamik suliaassanik qaqqileqqissinnaaneq kommuneni akileraaruseriffinnut nuunneqarnissaa.

§ 1, nr. 29-mut

Kommissionit akileraarusiisartut atorunnaarsinneqarnissaannik siunnersuuteqarneq pissutigalugu siunnersuutaavoq, akileraartussaataasup akileraarutit sinnerinut akiligassaminik § 62 naapertorlugu tamakkiisumik ilaannakuusumilluunniit akiliinnginnissaata Skatterådimit aalajangerneqarsinnaanissaa. Naak Skatterådi pinngitsoorani tusarniaasussaataannikkaluartoq naatsorsuutigineqarpoq rådip qinnuteqaatinik taamaattunik suliaqarnissaanut atatillugu Skatterådip kommuneni akileraaruseriffinnut paasissutissanik soqutiginaatilinnik piniartarnissaa.

§ 1, nr. 30-mut

Allannguinerup kingunerisaa tassani pineqarpoq.

§ 2-mut

Inatsisip ulloq 1. januar 2005-imiit atuutilernissaa siunnersuutaammat, tamanna isumaqarpoq kommuneni kommissionit akileraarusiisartut ulloq taanna aallarnerfigalugu atorunnaassasut.